



*Kamis, 17 Nopember 2022*

**Ogen: Pilipi 2:1-2**



Ersada Min Arihndu



**T**uhan encibalken keleng ateNa man doni enda benaken arah keluarga. ItepaNa manusia, dilaki ras diberu janah ipasu-pasuNa ku bas sada perjabun. Ituahina anak dilaki ras diberu guna engkuhi keriahen jabu e. Jabu e reh dekahna reh belinna seh jadi sada bangsa si mbelin. I bas sada jabu nari ka nge rehna keselamatan man doni enda. Tuhu, kerina si ilakoken kita i abs doni enda benaken i bas jabu nari.

Wari enda kita ipersinget arah surat Paulus man perpulungen Pilipi gelah kerina isi jabu ersada arih. I bas kerina anggota jabu e erbage nge karakter ras biakta. Amin pe anak-anak e dareh dagingta tapi lit nge si la seri ras kita. i bas si la seri e min lalap lit komunikasi, nuriken isi pusuh, cerita kerna pengalamen nggeluh adi bage banci kita si tandan ras siangkan.

Sada arih e ertina sada tujunnta i bas ngepkep jabu e, seri tujun nande ras bapa bage pe anak-anak. Bagi Dibata Bapa, Anak, ras Kesah Si Badia sada tujunna man doni enda e me gelah kerina manusia terkelin. Amin pelain-lain gia caranta ndahikensa ras ndalanisa tapi tujun jabuta e me malang man Dibata. I bas nehi tujun si seri e, perlu lit pengorbanen. Megati la bagi ukurta si idalanken anak-anak entah perbulangennta, bagem sialoken, ula mejungut, si nen paksa si tepat lako ercakup-cakap. Bas si la payo e pe banci nambahi kiniulin sabap banci saja bas la terukuri kita, anak ras perbulangen banci ngelakokensa guna nehi tujun jabunta ndai.

I bas ersada arih e tergejap min keleng ate isi jabu e. Bapa, nande ras anak, erlumba encidahken kelenga ate, la alu terpaksa engkelengi entah alu pusuh jungut-jungut. Keleng ate e teridah i bas litna saling mperdiateken keperluan anak jabu, mperdiateken kecibalna, ras muat bagin mpekena-kena keperluan anak jabu e. I bas mperdiateken e lit min keterbukan se isi jabu. Gelah banci jadi sada bas perukuren. Seh riahna adi kerina erlumba i bas encidahken ate keleng. Jabu labo terjeng status, jabu ercakup kerna keleng ate ras kebersamaan.